

Visit

**Dwarkadheeshvastu.com**

For

**FREE** Vastu Consultancy, Music, Epics, Devotional Videos  
Educational Books, Educational Videos, Wallpapers

————— \*\*\*\* —————

All Music is also available in **CD** format. **CD Cover** can also be print with your Firm Name

————— \*\*\*\* —————

We also provide this whole Music and Data in **PENDRIVE** and **EXTERNAL HARD DISK.**

**Contact : Ankit Mishra ( +91-8010381364, dwarkadheeshvastu@gmail.com )**

# Surdas Bhajan Maala

## हरिसो मीत न

हरि सो मीत न देखौं कोई।

अंतकाल सुमिरत तेहि अवसर आनि प्रतिच्छो होई॥  
ग्राह गहे गजपति मुकरायो हाथ चक्र लै धायो।  
तजि बैकुंठ गरुड़ तजि श्री तजि निकट दास के आयो॥  
दुरबासा को साप निवार्यो अंबरीष पति राखी।  
ब्रह्मलोक परजंत फिर्यो तहं, देव मुनीजन साखी॥  
लाखागृह तें जरत पांडु-सुत बुधि बल नाथ उवारे।  
सूरदास प्रभु अपने जन के नाना त्रास निवारे॥

## कृष्ण कहन कहा जात

तुम्हरो कृष्ण कहत कहा जात।

बिछुरे मिलन बहुरि कब हँ है ज्यों तरवर के पात ॥  
सीत वायु कफ कंठ बिरोध्यो रसना टूटी बात।  
प्राण लिये जम जात मूढ़ मति देखत जननी तात ॥  
छिनु एक मांह कोटि जुग बीतत, पाछे नरक की बात।  
यह जग प्रीति सुआ सेमर ज्यों चाखत ही उड़ि जात ॥  
जम की त्रास निकट नहि आवत चरनन चिल लगात।  
गावत सूर बृथा या देही इतनौ कत इतरात ॥

## जनम सफल कर लीजें

रे मन, कृष्ण नाम कहि लीजें ।  
 गुरु के बचन अटल करि मानो  
 साधु समागम कीजें ॥  
 पढ़िये गुनिये भगति भागवत  
 और कहा कथि कीजें ।  
 कृष्णनाम बिनु जनमु बादिही  
 विरथा काहे कीजें ॥  
 कृष्णनाम रस बह्यो जात है  
 तृषावन्त ह्ये पीजें ।  
 सूरदास हरिसरन ताकिये  
 जनम सफल करि लीजें ॥

## बहुरि न भव चलि आये

जो सुख होत गोपालहि गाये।  
सो नहि होत किये जप-तप के  
कोटिक तीरथ न्हाये ॥  
दिये लेत नहि चारि पदारथ,  
चरन कमल चित लाये।  
तीनि लोक तून सम करि लेखत,  
नंदनंदन उप आये ॥  
बंसीबट बृदावन जमुना  
तजि बैकुण्ठ को जाये।  
सूरदास हरि को सुमिरन करि,  
बहुरि न भव चलि आये ॥

## तुम जानत सब अंतरजामी

तुम मेरी राखी लाज हरी।

तुम जानत सब अंतरजामी, करनी कछु न करी ॥  
औगुन मोते विसरत नाहीं, पल छिन घरी घरी।  
सब प्रपंच की पोट बांधि कै, अपने सीस धरी ॥  
दारा-सुत-धन मोह लिये हैं, सुधि-बुधि सब विसरी।  
सूर पतित को बेग उधारो, अब मेरी नाव भरी ॥



## जनके दुःख निवारो

अब मोहि भीजत क्यों न उबारो ।

दीनबन्धु करुनामय स्वामी, जनके दुःख निवारो ॥  
ममता घटा, मोह की बूंदें, सरिता में अपारो ।  
बूढ़त कहुं थाह नहिं पावत, गुरुजन ओट अधारो ॥  
गरजन क्रोध, लोभ को नारो, सूझत कहुं न उधारो ।  
तूसना तड़ित चमकि छिन ही छिन, अह निसि यह तन जारो ॥  
यह सब जल कलिमलहिं गहे है, बोरत सहस प्रकारो ।  
सूरदास पतितन को संगी, बिरदहिं नाथ सम्हारो ॥



## तुम्हरे चरन गहों

जैसेहि राखौ तैसेहि रहौं ।

जानत ही सब दुख-सुख जनकौ मुखकरि कहा कहीं ॥  
कबहुंक भोजन देत कृपाकरि कबहुंक भूख सहौं ।  
कबहुंक चढ़ौ तुंग महागज कबहुंक भार बहौं ॥  
कमलनयन घनस्याम मनोहर अनुचर भयो रहौं ।  
सूरदास प्रभु भगत कृपानिधि तुम्हरे चरन गहौं ॥

## बंदी चरन सरोज

बंदी चरन सरोज तुम्हारे।

जे पदपदुम सदासिव के धन, सिंधुसुता उरते नहिं टारे ॥  
जे पदपदुम परसि भइ पावन, सुरसरि दरस कटत अब भारे।  
जे पदपदुम परसि ऋषि-पत्नी, बलि, नृप, व्याध-पतित बहु तारे ॥  
जे पदपदुम रमत बुंदावन अहि सिर धरि, अगनित रिपु मारे।  
जे पदपदुम परसि ब्रज भामिनि, सरबसु दै सुत सदन बिसारे ॥  
जे पदपदुम रमत पांडव दल दूत, भये सब काज संवारे।  
सूरदास तेई पदपंकज त्रिविध, ताप दुख हरन हमारे ॥



## हारे को हरिनाम

सुने री मैंने निरबल के बल राम।

पिछली साख भरुं संतन की, अड़े संवारे काम॥

जब लगी राज बल अपना बरत्यों, नेक सरयो नहिं काम।

निरबल है बल राम पुकार्यो, आये आधे नाम॥

द्रुपद सुता निरबल भड़ ता दिन, तजि आये निज धाम।

दुस्सासन की भुजा थकित भई, बसन रूप भये स्याम॥

अप-बल, तप-बल और बाहु-बल, चौथो है बल दाम।

सूर किसोर-कृपा तें सब बल, हारे को हरिनाम॥

## सुनहु करुना मूल

अबके माधव मोहि उधारि।

मगन हौं भव-अंघु-निधि में कृपासिंधु मुरारि ॥  
 नीर अति राग्भीर माया, लोभ लहरि तरंग।  
 लिये जात अगाध जल में गहे ग्राह अतंग ॥  
 मोन इंद्रिय अतिहि काटत मोट अघ सिर भार।  
 पग न इत उत धरन पावत उरझि मोह सेवार ॥  
 काम क्रोध समेत तृस्ना पवन अति झकझोर।  
 नाहि चितवन देत तिय सुत नाम नौका ओर ॥  
 थक्यो बीच बेहाल बिहबल सुनहु करुना मूल।  
 स्याम भुज गहि काढ़ि डारहु सूर ब्रज के कुल ॥

## अनत कहूँ नहिं पाऊँ

काके द्वार जाइ सिर नाऊँ, पर हथ कहां बिकाऊँ ॥  
 ऐसो को दाता है समर्थ, जाके दिये अघाऊँ।  
 अंतकाल तुमरो सुमिरन गति, अनत कहूँ नहिं पाऊँ ॥  
 रंक अचाची कियो सुदामा, दियो अभय पद ठाऊँ।  
 कामधेनु चिंतामनि दीनो, कल्प, बृच्छ तर छाऊँ ॥  
 भवसमुद्र अति देखि भयानक, मन से अधिक डराऊँ।  
 कीजै कृपा सुमिरि अपनो पन, सूरदास बलि जाऊँ ॥

## चढ़त न दूजो रंग

छाड़ि मन हरि विमुखन को संग।

जिनके संग कुबुधि उपजति है परत भजन में भंग ॥  
कहा होत पय पान कराये, विष नहिं तजत भुजंग।  
कागहि कहा कपूर चुगाये स्वान नहाये गंग ॥  
खर को कहा अरगजा-लेपन, मरकट भूषण अंग।  
गज को कहा न्हावाये सरिता बहुरि धरै खहि छंग ॥  
पाहन पतित बांन नहिं बेधत, रीतो करत नियंग।  
सूरदास खल कारी कामरी, चढ़त न दूजो रंग ॥

## भगति बिनु

भगति बिनु बैल बिराने हँहो ॥

पांव चारि, सिर सींग, गूंग मुख, तब गुन कैसे गँहौ ।  
टूटे कंध सु-फूटी नाकनि, कौ लौ धौ भुस खँहो ॥  
लादत जातत लकुट बाजिहँ, तब कहं मूड़ दुँहौ ।  
सीत घाम घन विपति बहुत विधि, भार तरे मरि जँहौ ।  
हरि-दासन को कह्यौ न मानत, कियो आपनो पैहौ ।  
सूरदास भगवंत भजन बिनु, मिथ्या जनम गँवँहौ ॥

## नाम भजन बिनु

रे मन मूरख जनम गंवायो।

कर अभिमान विषय सों राच्यों, नाम सरन नहि आयो ॥

यह संसार फूल सेमर को, सुंदर देखि लुभायो।

चाखन लाग्यो रूई उड़ि गइ, हाथ कछु नहि आयो ॥

कहा भयो अब के मन सोचे, पहिले नहि कमायो।

सूरदास हरि नाम-भजन बिनु, सिर धुनि-धुनि पछितायो ॥

## विरथा यह देही

रे मन जनम अकारथ जात।

बिछुरे मिलन बहुरि कव द्वे हैं ज्यों तरुवर के पात ॥  
सन्निपात कफ कंठ विरोधी, रसना टूटी जात।  
प्राण लिये जम जात मूढ़मति, देखत जननी तात ॥  
छिन इक मांहि कोटि जुग बीतत, फेरि नरक की बात।  
यह जग प्रीति सुआ सेमर की, चाखत ही उड़ि जात ॥  
जमके फंद नाहि परू बीरे, चरनन चित्त लगात।  
कहत सूर विरथा यह देही, काहे को इतरात ॥

## कहाँ कौन गति

कितक दिन हरि सुमिरन बिन खोये।

पर निंदा रस में रसना के सगरे परत डबोये॥

तेल लगाइ कियो रुचि मर्दन बस्त्रहि मलि मलि धोये।

तिलक लगाइ चले स्वामी बनि विषयनि के मुख जोये॥

काल बलीते सब जग कंपत ब्रह्मादिक हूं रोये।

सूर अधम की कहीं कौन गति उदरि भरे पर सोये॥

## जे भजत राम को

कहा कमी जाके रामधनी

मनसा नाथ मनोरथ-पूरन सुखनिधान जाकी मौज घनी ॥  
अर्थ धर्म अरु काम मोच्छ फल, चार पदारथ देत छनी ।  
इन्द्र समान है जाके सेवक मो बपुरे की कहा गनी ॥  
कहौ कृपन की माया कितनी करत फिरत अपनी अपनी ।  
खाइ न सकै खरच नहिं जानै ज्यों भुजंग सिर रहत मनी ॥  
आनंद मगन रामगुन गावै दुख संताप की काटि तनी ।  
सूर कहत जे भजत राम को, तिन सों हरिसों सदा बनी ॥

## यह अजहूं है छोटी

भैया कबहिं बढ़ेगी चोटी!

कितनी बार मोहि दूध पिवत भई यह अजहूं है छोटी ॥  
तू जो कहति बल की बेंनी ज्यों ह्वैहे लांबी मोटी ।  
काढ़त गुहत नहावत ओंछति नागिन-सी ह्वै लोटी ॥  
काचो दूध पिवावत पचि पचि देत न माखन रोटी ।  
सूर स्याम चिरजिव दोउ भैया हरि-हलधर की जोटी ॥



## मैं नहिं माखन खायो

मैया मोरी मैं नहिं माखन खायो।

भोर भयो गैवन के पाछे, मधुवन मोहि पठायो ॥  
चार पहर बंसीबट भटक्यो, सांझ परे घर आयो।  
मैं बालक बहियन को छोटी, छींको केहि बिधि पायो ॥  
ग्वाल बाल सब बैर परे हैं, बरबस मुख लपटायो।  
तू जननी मन की अति भोरी, इनके कहे पतिआयो ॥  
जिय तेरे कछु भेद उपजिहैं, जानि परायो जायो।  
यह ले अपनी लकुटि कमरिया, बहुतहि नाच नचायो ॥  
सूरदास तब बिहंसि जसोदा, लै उर कंठ लगायो ॥

## तुमरे दरस को

कहन लगे मोहन, मैया मैया ।

पिता नंद सों बाबा बाबा अरु हलधर सों भैया ।

ऊंचे चढ़ि चढ़ि कहत जसोदा लै लै नाम कहैया ॥

दूरि कहूं जिनि जाहु लला रे मारेगी काहु की गैया ।

गोपी ग्वाल करत कौतूहल घर घर लेत बलैया ॥

घनिखंभन प्रतिबिंब बिलोकत नाचत कुंवर कहैया ।

नंद जसोदाजी के उरतें इह छवि अनत न जइया ॥

सूरदास प्रभु तुमरे दरस को चरन की बलि जैया ।

## देवकी सों कहियो

संदेसो देवकी सों कहियो ।

हों तो धाय तुम्हारे सुत की भया करत नित रहियो ॥

जदपि देव तुम जानत उनकी तऊ मोहि कहि आवै ।

प्रातहि उठत श्याम सुन्दर को माखन रोटी भावै ॥

तेल उबटनो अरु तातो जल, ताहि देखि भजि जावै ।

जोड़ जोड़ मांगत सोइ सोइ देती क्रम क्रम करि करि न्हावै ॥

सूर पथिक सुनि मोहि रैन दिन बढ़यो रहत उर सोच ।

मेरो ललित लडैतो मोहन हैहे करत सकोच ॥

संदेसो देवकी सों कहियो ।

## सरबस लै गयो नंदकिशोर

मधुकर स्याम हमारे चोर।

मन हर लियो माधुरी मूरत निरख नयन की कोर॥  
पकरे हुते आन उर अंतर प्रेम प्रीति के जोर।  
गये छुड़ाय तोर सब बंधन दै गये हंसन अकोर॥  
उचक परों जागत निसि बीते तारे गिनत भई भोर।  
सूरदास प्रभु हत मन मेरो, सरबस लै गयो नंदकिशोर॥

## बिन गुपाल

बिन गुपाल बैरन भई कुंजै ।  
तब ये लता लगति अति सीतल,  
अब भई विषम ज्वाल की पुंजै ॥  
बृथा बहत जमुना, खग बोलत,  
बृथा कमल फूलें, अलि गुंजै ।  
पवन, पानि घनसार, सजीवनि,  
दधि-सुत-किरनभानु भई भुंजै ॥  
हे ऊधो कहियो माधव सों,  
विरह करत कर मारत लुंजै ।  
सूरदास प्रभु का मग जोवत,  
अंखियां भई बरन ज्यों गुंजै ॥

## जब तें स्याम सिधारे

निसिदिन बरसत नैन हमारे।  
सदा रहत पावस ऋतु हम पर  
जब तें स्याम सिधारे ॥  
अंजन थिर न रहत अंखियन में  
कर कपोल भये करे।  
कंचुकि-पट सूखत नहिं कबहुं,  
उर विच बहत पनारे ॥  
आंसू सलिल भये पग थाके,  
बहे जात नित सारे ॥  
सूरदास अब डूबत है ब्रज,  
काहे न लेत उधारे ॥

## कहँ लागि करौं बड़ाई

सबसों ऊंची प्रेम सगाई।

दुरजोधन के मेवा त्यागे, साग बिदुर घर खाई ॥  
जूठे फल सबरी के खाये, बहु बिधि स्वाद बताई।  
प्रेम के बस नृप सेवा कीन्हों आप बने हरि नाई ॥  
राजसु, जग्य जुधिष्टिर कीन्हों तामे जूठ उठाई।  
प्रेम के बस पार्थ रथ हांक्यो, भूलि गये ठकुराई ॥  
ऐसी प्रीति बड़ी बृंदावन, गोपिन नाच नचाई।  
सूर कूर इहि लायक नाहीं, कहँ लागि करौं बड़ाई ॥

## कृष्ण बिना

सोइ रसना जो हरिगुन गावै ।  
नैनन की छबि यहै चतुरता,  
ज्यों मकरंद मुकुदहि ध्यावै ॥  
निर्मल चित्त तौ सोई सांचो,  
कृष्ण बिना जिय और न भावै ।  
खवतन की जु यहै अधिकाई,  
सुनि हरि कथा सुधारस प्यावै ॥  
कर तेई जे स्यामहि सेवै  
चरननि चलि बृंदावन जावै ।  
सूरदास जैये बलि ताके,  
जो हरिजू सों प्रीति बढावै ॥

## मन अभिलाष करै

जसुमति मन अभिलाष करै।

कब मेरो लाल घुटुरुवन रंगै कब धरनी पग द्वैक धरै ॥  
कब द्वै दंत दूध के देखौं कब तुतरे मुख बैन झरै।  
कब नंदहि कहि बाबा बोलै कब जननी कहि मोहि ररै ॥  
कब मेरो अंचरा गहि मोहना जोड़-सोड़ कहि मो सों झगरै।  
कब धौ तनक तनक कछु खैहैं अपने कर सों मुखहिं भरै ॥  
कब हंसि बात कहैगो मो सों छबि पेखत दुख दूरि टरै।  
स्याम अकेले आंगन छांडे आयु गई कछु काज घरै ॥  
एहि अंतर अंधबाड़ उठी इक गरजत गमन सहित थहरै।  
सूरदास ब्रज लोग सुनत धुनि जो जहं तहं सब अतिहि डरै ॥



## ब्रज बिसरत नाही

अथो मोहिं ब्रज बिसरत नाही ।

हंससुता की सुंदर कलख अठ तरुवन की छाहीं ॥  
वे सुरभी वे बच्छ दोहनी खिरक दुहावन जाहीं ।  
ग्वालबाल सब करत कुलाहल नाचत गह-गह बाहीं ॥  
यह मथुरा कंचन की नगरी मनि-मुक्ता जिहि माहीं ।  
जबहि सुरत आवत वा सुख की जिया उमगत सुध नाही ॥  
अनगिन भाति करी बहु लीला जसुदा-नंद निबाही ।  
सूरदास प्रभु रहे मौन मह गह कह-कह पछिताहीं ॥



## कहाँ लौं कहिये

कहाँ लौं कहिये ब्रज की बात।

सुनहु स्याम तुम बिनु उन लोगइ जैसे दिवस बितात ॥  
गोपी गाई खाल गोसुत वह मलिन बदन कुस गात ॥  
परमदीन जनु सिसिर हिमी हित अंबुजगन बिनु पात ॥  
जा कहुं आवत देखि दूर ते सब पूछति कुसलात ॥  
चलत न देत प्रेम आतुर उर कर चरनन लपटात ॥  
पिक चातक बन बसन न पावहि बाधस बलिहि न खात ॥  
सूर स्याम संदेसन के डर पथिक न उहि मग जात ॥

## ऐसी प्रीति की

ऐसी प्रीति की बलि जाउं।

सिंहासन तजि चले मिलन को सुनत सुदामा नाउं ॥  
गुरु-बांधव अरु बिप्र जानिकै चरनन हाथ पखारे।  
अङ्कगाल दै कुसल बूझिके सिंहासन बैठारे ॥  
अरधंगी बूझत मोहन को कैसे हितू तुम्हारे।  
दुर्बल हीन छीन देखतिहो पाउं कहां ते धारे ॥  
संदीपन के हम औ, सुदामा पढ़े एक चटसार।  
सूर स्याम की कौन चलावै भक्तन कृपा अपार ॥



हरि कृष्ण \* हरि कृष्ण \* हरि कृष्ण \* हरि कृष्ण \* हरि कृष्ण \* हरि कृष्ण \* हरि कृष्ण \* हरि कृष्ण

\* हरि कृष्ण \* हरि कृष्ण \* हरि कृष्ण \* हरि कृष्ण \* हरि कृष्ण \* हरि कृष्ण \* हरि कृष्ण \* हरि कृष्ण

\* हरि कृष्ण \* हरि कृष्ण \* हरि कृष्ण \* हरि कृष्ण \* हरि कृष्ण \* हरि कृष्ण \* हरि कृष्ण \* हरि कृष्ण

# प्रभु बिन दुख दूनो

प्रीति करि काहुं सुख न लह्यो ।  
 प्रीति पतंग करी दीपक सों  
 आपै प्राण दह्यो ॥

अलिसुत प्रीति करी जलसुत सों  
 करि मुख मांहि गह्यो ।  
 सारंग प्रीति करी जो नाद सों  
 सन्मुख बान सह्यो ॥

हम जो प्रीति करी माधव सों  
 बनत न कछु कह्यो ।  
 सूरदास प्रभु बिनु दुख दूनो  
 नैननि नीर बह्यो ॥

## तुम्हारी कृपा ते

जो हम भले-बुरे तौ तेरे

तुम्हें हमारी लाज बढ़ाई, विनती सुनु प्रभु मेरे।  
सब तजि तुव सरनागत आयो, निज कर चरन गहै रे।  
तुव प्रताप बल बढत न काहुं, निडर भये घर चैरे।  
और देव सब रंक भिखारी, त्यागे बहुत घनेरे।  
सूरदास प्रभु तुम्हारी कृपा ते पाये सुख जु घनेरे।

## सूरदास द्वार ठाढ़े

दीनन दुखहरन देव, सन्तन सुखकारी  
 अजामिल गीध ब्याध, इनमें कहां कौन साध,  
 पंछी हूं पद पढ़ात गानिका-सी तारी।  
 धुव के सिर छत्र देत, प्रह्लाद कहं उबार लेत,  
 भगत हेत बांध्यो सेत, लंकापुरी जारी।  
 तंदुल देत रीझ जात, सागपातसों अघात,  
 गिनत नहिं जूठे फल खाटे मीठे खारी।  
 गजको जब गाह ग्रस्यो, दुस्सासन चीर खस्यो,  
 सभा बीच कृष्ण कृष्ण, द्रौपदी पुकारी।  
 इतने में हरि आई गये, बसनम आरूढ़ भये,  
 सूरदास द्वारे ठाढ़ो आंधरो भिखारी।

## जै जै कृपा निधान

अबकी राखि लेहु भगवान।

हम अनाथ बैठे द्रुम-डरियां, पारथि साध्यो बान।  
ताके डर निकसन चाहत हैं, ऊपर रह्यो सचान।  
दुहुं भांति दुख भयो कृपानिधि, कौन उबारै प्रान।  
सुमिरत ही अहि डस्यो पारथी, लाग्यो तीर सचान।  
सुरदास गुन कहं लग चरनों, जै जै कृपानिधान।

## प्रभुजी को चैरो

हमें नन्दनन्दन मोल लियो।

जपकी फांसि काटि मुकरायो अभय अजात कियो।

मूड़ मुड़ाव कंठ बन माला चक्र के चिह्न दियो।

माथे तिलक स्रवन तुलसीदास मेटेव अंग बियो।

सब कोउ कहत गुलाम स्वाम को सुनत सिहात हियो।

सूरदास प्रभुजी को चैरो जूठनि खाव जियो।

## मो सम

मो सम कौन कुटिल खल कामी।

जिन तनु दियो ताहि बिसरायो, ऐसो नमकहरामी।

भरि भरि उदर बिषय कों धायो जैसे सूकर-ग्रामी।

हरिजन छांड़ि हरी बिमुखन को किसि दिन करत गुलामी।

पापी कौन बड़ों जग मो ते सब पतितन में नामी।

सूर पतित को ठौर कहाँ है, तुम बिनु श्रीपति स्वामी।

## भजन विन

भजन विन कूकर सूकर जैसो।

जैसे घर बिलाव के मूसा, रहत बिषय-ब्रस तैसो।

बकी और बक गीध गीधनी, आई जनम लिय वैसों।

उनहूँ के ये सुत दारा हैं, इन्हें भेद कहूँ कैसो।

जीव मारिके उदर भरत हैं, तिनके लेखे ऐसो।

सूरदास भगवंत भजन विनु, मनो ऊंट खर भैसों।

## जो भगत विरोधी

हम भगतन के भगत हमारे।

सुन अरजुन परतिग्या मोरी यह बत टरत न टारे।  
भगतन काज लाज हिय धारिकै पांय पियादे धायौ।  
जहं-जहं भीर परे भगतन पै तहं-तहं होत सहायौ।  
जो भगतन सों बैर करत है सो निज बैरी मेरो।  
देख विचार भगत हित कारन हांकत हों रथ तेरो।  
जीते-जीत भगत अपने की हारे हार विचारों।  
सूरस्याम जो भगत विरोधी चक्र सुदरसन मारों।

## जसोदा हरि पालने झुलावै

जसोदा हरि पालने झुलावै

हरावै दुलरावै मल्हारवै जोई सोई कछु गावै ।  
मेरे लाल को आउ निंदरिया काहे न आनि सुआवै ।  
तू काहे न बेगि-सी आवै तोको कान्ह बुलावै ।  
कबहुं पलक हरि मूदि लेत हैं कबहुं अधर फरकावै ।  
सोवत जानि मीन हवै हवै रही कर कर सैन बतावै ।  
इहि अन्तर अकुलाइ उठे हरि जसुमति मधुरे गावै ।  
जो सुख सूर अमर मुनि दुर्लभ सो नेद भामिनी पावै ।